

## Morning Dogri (NSD) Bulletin 14-06-2026

### आकाशवाणी

1. प्रधानमंत्री नरेंद्र मोदी फ्रांस ते स्लोवाकिया दी अपनी यात्रा दे पैहले चरणै च फ्रांस दे शैहर नीस पुज्जे। जी-7 शिखर सम्मेलन च शिरकत करने कोला पैहले ओहू राष्ट्रपति मैक्रों हुंदे नै दपक्खी गल्लबात करंगन।
2. इसरो लूनर लैंडर गी चन्नै पर जबरदस्त ठंडू शा बचाने लेई परमाणु उर्जा विभाग कन्नै मिलियै उन्नत किस्मै दी आर्टिफिशल हीटिंग बवस्था तैयार करग।
3. मौसम विभाग दा आखना ऐ जे औंदे दो'त्रै दिनें च दक्खन पच्छिम मानसून, कर्नाटक, तेलंगाना, आंध्र प्रदेश, ओडिशा ते दक्खनी छत्तीसगढ़ तगर पुज्जी सकदा ऐ।
4. अमरीकी राष्ट्रपति डानल्ड ट्रम्प होरें अज्ज ईरान कन्नै समझौता होई जाने दी मेद दस्सी ऐ, ईरान दा आखना कि लड़ाई रोकने सरबन्धी कुसै समझौते पर तुरत सैहमति दी मेद नेई।
5. मजूदा 3 वन डे मैचें दी श्रृंखला दे पैहले मैच च भारत नै अफगानिस्तान गी 7 विकेटें कन्नै हराई दित्ता।
6. आई.सी.सी महिला टी-20 विश्व कप च भारत अपने अभियान दी शुरूआत अज्ज पाकिस्तान कन्नै मैच कन्नै करोग।

<><><><><><>

PM-France Visit

प्रधानमंत्री नरेंद्र मोदी होर फ्रांस ते स्लोवाकिया दी अपनी यात्रा दे पैहले गेड़ च जंदी रातीं फ्रांस दे नीस शैहर पुजे। जी-7 शिखर सम्मेलन कोला पैहले मोदी होर अज्ज फ्रांस दे राष्ट्रपति एमैनुअल मैक्रों हुंदे कन्नै ते कुल संसारिक मुद्दें पर इलाकाई दपक्खी गल्लबात करडन ते भारत दे स्टार्टअप्स ते नवाचार प्रणाली गी दुनिया भरै थमां रास पूंजी लाने आहले ते बजारें कन्नै जोड़ने आहले शिक्षा मंत्रालय दे कार्यक्रम भारत इनोवेट्स दा सांझे तौरा पर उद्घाटन करडन।

<><><><><><>

### ISRO-Lunar Lander

भारती अंतरिक्ष अनुसंधान संगठन इसरो लूनर लैंडर गी चन्नै पर जबरदस्त ठंडू शा बचाने लेई परमाणु उर्जा विभाग कन्नै मिलियै उन्नत किस्मे दी आर्टिफिशल हीटिंग बवस्था तैयार करग। इसरो दे प्रमुख बी नारायण होरें बंगलुरु च वैज्ञानिक ते औद्योगिक अनुसंधान परिषद ते स्टार्ट अप उद्यमता सम्मेलन च आखेआ कि सूरज दी तपश कन्नै चलने आहला चंद्रयान त्रै दा विक्रम लैंडर चन्नै पर छड़ा 14एं दिनें तगर कम् करदा रेहा ते हून इसरो परमाणु उर्जा विभाग कन्नै मिलियै नेहा लैंडर तैयार करने पर कम्म करा करदा ऐ जेहड़ा चन्नै पर 200 दिनें तगर कम्म करी सकै। इस लैंडर च ना साजगार मौसम च बी कम्म करने दी छमता बधाने आहले आर्टिफिशल हीटर लग्गे दे होंगन।

<><><><><><>

### Raja Utsav

राष्ट्रपति द्रौपदी मुर्मू होरें उडीसा दे फसल उत्सव राजा पर्व दे मौके पर देशवासिएं, टकोहदा करियै ओडिशा दे लोकें गी दिली ममारकबाद ते शुभकामनां दित्तियां न। अपने इक सोशल

मीडिया पोस्ट च राष्ट्रपति होरें राजा उत्सव गी मानसून दे सुआगत दा ध्यार दस्सेया जेहडा धरती, मातृत्वभाव ते बद्दलें दा सम्मान करने लेई मनाया जंदा ऐ।

<><><><><><>

IMD

मौसम विभाग नै अज्ज पूर्वोत्तर क्षेत्र अंडमान ते निकोबार द्वीप समूह केरलम, माहे, ओडिशा, तमिलनाडू, पुदुचेरी ते कराईकल दे किश हिस्सें च तेज बरखा बरने दी पेशगोई कीती ऐ। मैहकमे मूजब अगले दो-त्रै दिनें च दक्खन पच्छिम मानसून दे कर्नाटक, तेलंगाना, आंध्र प्रदेश, ओडिशा ते दक्खन छत्तीसगढ दे किश हिस्सें च अगगे बरने ताई हालात साजगार न। मैहकमे नै पूर्वी राजस्थान दियें किश थाहरें पर अज्ज 60 थमां 70 किलोमीटर शा लेइयै 80 किलोमीटर फही घंटा तगर दी रफ्तार कन्नै हवा चलने दी शैका व्यक्त कीती ऐ।

<><><><><><>

US-Iran Peace Agree

अमरीका दे राष्ट्रपति डानल्ड ट्रम्प होरें ईरान कन्नै लड्जई खत्म करने दे समझौते पर अज्ज दस्तखत होई जाने दी मेद प्रगट कीती ऐ। एहदे तुरत मगरा होमुर्ज जलडमरूमध्य सभने लेई खोली दित्ता जाह्ग। ट्रम्प होरें अपने इक सोशल मीडिया पर इस बारै घोशणा करदे होई आखेआ कि एह वार्ता कामयाब रौहग, पर जेकर इयां नेई होंदा तां उन्दे कश खीरी दाह बी ऐ। ट्रम्प होरें इस प्रस्तावित समझौते दी तुलना 2015 दी संयुक्त कार्ययोजना कन्नै बी कीती ते आखेआ कि उंदे इस प्रस्तावित समझौते कन्नै ईरान दे परमाणु थेहारें पर पूरी चाल्ली रोक लग्गी जाह्ग। उनें दावा कीता ऐ कि ईरान दे रोक लाई गेई ऐ ते बाकी परमाणु सामग्री गी मगरा नष्ट करी दित्ता जाह्ग।



## US Prez. PM Modi Meel

अमरीकी राश्ट्रपति भवन व्हाइट हाउस दा आखना ऐ कि प्रधानमंत्री नरेंद्र मोदी ते अमरीकी राश्ट्रपति डानल्ड ट्रम्प हुंदे बश्कार फ्रांस दे एवियन शैहर च होने आहले जी-7 शिखर सम्मेलन दे दरान दपक्खी गल्लबात होग। फरवरी 2025 च मोदी हुंदे अमरीका दौरे दे बाद दौने नेताएं दी साम-धाम एहू पैहली मलाटी होग। जानकारी मूजब औंदे बुधवारें इस बैठक दे होने दी मेद ऐ। इस महत्वपूर्ण दपक्खी बैठका च जिनें मुद्दें ते विषें पर गल्लबाह होई सकदी ऐ, उन्दे च दौनें मुलखें बश्कार बकाया पेदे संभावित बपार समझौते, रणनीतिक सांझ भ्याली गी रफ्तार देने बारै चर्चा, कुल संसारी सुरक्षा ते रास पूंजी लाने बारै गल्लबात, एच-वन वीजा ते आर्टिफिशल इंटेलीजेंस जनेए तकनीकी मामलें पर विचार बटांदरा शामिल ऐ।



## Cricket Ind. Afghan

भारत नै कल राती हिमाचल प्रदेश दे धर्मशाला च मजूदा इक ध्याड़े आहले 3 मैचं दी श्रृंखला गी 7 विकटें कन्नै हराई दित्ता। भारत नै 22 ओवर ते 5 गेंदें च गै 195 रन दा लक्ष्य हासल करी लैता। कप्तान शुभमन गिल नै 66 गेंदें च 84 रन बनाए ते नाट आउट रेह। पैहले बल्लेबाजी करदे होई अफगानिस्तान नै 24 ओवर ते 5 गेंदें च 194 रन बनाए हे ते भारत दे सामने 195 रन दा लक्ष्य रखेआ हा। उप्परोतली बरखा दे कारण मैच चिरें शुरू होआ जेह्दे चलदे इसी 50 दे बजाय 25एं ओवरें दा करी दित्ता गेआ। श्रृंखला दा दूआ मैच 17 तरीक गी लखनऊ च खेडेआ जाह्ग।



## Women T20

आई.सी.सी महिला टी-20 विश्व कप च अज्ज भारत अपने अभियान दी शुरूआत पाकिस्तान कन्नै मैच कन्नै करग। ग्रुप-ए दा एहू मैच बर्मिंघम दे एजबेस्टन च भाती समें मताबक संझा 7 बजे शुरू होग। महिला टी-20 अंतरराश्ट्री मैचें च भारत अजें धोड़ी पाकिस्तान गी 16एं चा 13एं मकाबलें च हराई चुके दा ऐं अज्ज दे इक होर मकाबले च नीरदलैंड्स ते बांगलादेश दियां टीमां आमने-सामने होंगन। एहू मैच भारती समें मताबक बड्डुलै साड्डे 10 बजे शुरू होग। तोआई ग्रुप बी च वेस्ट इंडीज नै मजूदा चैंपियन इंगलैंड गी 7 विकटें कन्नै हराया जिसलै दे ग्रुप ए दे इक होर मकाबले च कल मैनचेस्टर दे ओल्ड ट्रैफर्ड च आस्ट्रेलिया नै दक्खन अफ्रीका गी 65 रन कन्नै ते कल गै ग्रुप बी दे इक मकाबले च स्कॉटलैंड नै आयरलैंड गी 40 रन कन्नै हराया।

<><><><><><>